

Corona di Divino Misericordia Canta, un instrumento humilde

STA. CRUZ -- Ta un honor pa por presenta na un y tur, un proyecto di asina importancia pa e pueblo di Aruba y pa humanidad cu ta e proyecto di "Corona di Divino Misericordia Canta" na nos idioma Papiamento.

E proyecto di "Divino Misericordia Canta" a wordo inicia algun aña pasa y den e siman aki unda nos ta enfoca riba e Divino Misericordia, cu oracionnan, nobena, confesion, obranan di misericordia y veneracion di Su Imagen, practicando pleno Confianza den Señor y fihando nos curason riba e Fiesta di Divino Misericordia di diadomingo venidero 1 di Mei. Nos ta ofrece na tur e fielnan e CD chikito aki, cu ta grandi den significacion. Aunke e CD ta contene solamente 6 track, di cual 5 ta resa y e Corona mes cu ta canta – e por wordo mira como instrumento humilde pa por engrandec e devocion na e Divino Misericordia di nos Señor.

Pa medio di e fiel devocion na e Divino Misericordia y di e importancia di esaki pa tur e fielnan – tur Yiu di Dios, un meta a wordo poni pa por logra haci e grabacion aki especificamente. Cu aprobacion oficial y entusiasmo di Sra. Trish Short, di Chaplet Music na Merca, na ken e melodia aki ta pertenece y despues di a cumpli cu e revision di e oracion aki door di Obispo Secco y Pastor Daniel Szpila, como un exigencia di "Marians of the Immaculate Conception", e grabacion aki a wordo haci bou di direccion di Sra. Maybelline Arends-Croes, cu supervision di Venny Trinidad y canto di "Melange" hunto cu Edjean Semeleer y algun miembro di "Coro Tutti Frutti". E demo a wordo manda pa "Chaplet



Music" y e grabacion a wordo oficialmente aproba pa publicacion. Pa por a enfatisa e importancia di e oracion aki hunto cu e devocion na Divino Misericordia, "Marians of the Immaculate Conception" a duna aprobacion pa usa algun seccion for di e "Diario di Sta. Faustina Kowalska", traduci na nos idioma Papiamento, solamente despues cu nos a cumpli cu e siguiente rekisitonan: Tur texto cu a wordo traduci, mester a wordo coregi door di un corector oficial di Papiamento y aproba pa Iglesia – consecuentemente un aprobacion oficial di Obispo tawata necesario pa por a logra esaki. Pa e motibo ey e CD aki ta carga permiso oficial di "Marians of the Immaculate Conception" for di Stockbridge Massachussets pa uso di tur texto, oracion y portret usa riba e cover y tambe un Imprimatur oficial di Obispo Luis A. Secco. Nos ta sumamente gradicido na tur esnan cu a ofrece nan incansabel cooperacion y esfuerso, cu hopi amor y dedicacion na e proyecto aki.

E Corona di Divino Misericordia ta un oracion cu Hesus a duna Sta. Faustina Kowalska den un di Su aparicionnan na dje na Polen na

aña 1933. Hesus a pidi Sta. Faustina pa bay den henter mundo y promove e Devocion na Su Divino Misericordia y engrandec e Confiansa di cada alma na djE. E devocion di Divino Misericordia ta uno cu ta ofrece promesanan grandi di nos Señor Hesucristo pa cada alma por wordo salba pa medio di oceano infinito di Misericordia cu nos Señor ta drama riba cada un di nos ora cu nos Confiansa ta pleno den djE y nos arepentí cu un curason sincero. Laga nos celebra diadomingo awor e Fiesta di Divino Misericordia como parti di e devocion aki y ricibi Gran Misericordia ora cu tur e portanan cu ta tene e Misericordia infinito di Hesus, wordo habri pa un y tur cu ta Confia y Kere plenamente den djE.

E CD di Corona di Divino Misericordia aki ta obtenibel serca tur miembro di Melange, Maybelline Arends – Croes, Skina di Buki na Misa di Dakota, CD & More y Cambalache. E prijs ta Afls. 15 pa 1 CD, Afls. 25 pa 1 CD cu un bunita Rosario di palo. Rosario di palo apart ta costa Afls. 15. Loke wordo recauda di e venta di e CD aki lo bay pa metanan specifico pa promove Fe, Confiansa, Amor y Misericordia.